

15/02/1998

Mahathir, Goh tumpu masalah ekonomi

KUALA LUMPUR: Datuk Seri Dr Mahathir Mohamad berkata, perbincangan dengan rakan sejawatnya dari Singapura, Goh Chok Tong, yang akan melawat negara ini esok, akan tertumpu kepada soal kegawatan ekonomi serantau dan mencari jalan menanganinya.

"Tidak ada isu kecuali untuk berbincang bagaimana hendak menangani masalah yang sama-sama dihadapi serta memperkukuhkan lagi hubungan kedua-dua negara," katanya mengulas kunjungan Goh ke ibu negara selama dua hari.

Kali terakhir kedua-dua pemimpin bertemu seminggu lalu di Singapura. Ini adalah pertemuan ketiga mereka tahun ini. Sebelum ini, mereka bertemu di Johor Bahru pada 20 Januari lalu.

Menurut Wisma Putra, selain isu kewangan dan ekonomi, kedua-dua pemimpin akan menumpukan soal meningkatkan perdagangan di antara Asean dan menggalakkan penggunaan mata wang rantau ini.

Terdahulu, Dr Mahathir dan isteri, Datin Seri Dr Siti Hasmah Mohd Ali, menghadiri majlis jamuan hari raya anjuran Persatuan Bekas Pelajar-Pelajar Maktab Sultan Abdul Hamid Alor Star (Sahoca) di sini. Beliau adalah presiden persatuan itu.

Majlis itu dihadiri lebih 500 ahli serta keluarga. Turut hadir ialah Pengerusi Penerbangan Malaysia (MAS), Tan Sri Tajuddin Ramli selaku Pengerusi Sahoca; timbalan pengerusi, Datuk Abdul Halim Abdullah serta setiausaha kehormat, Syed Khadzil Al-Jaffree.

Tetamu istimewa yang hadir ialah bekas guru Dr Mahathir, Datuk Mohd Zain Abdul Rashid, 84, yang mengajar mata pelajaran bahasa Melayu dan Inggeris ketika Perdana Menteri darjah dua.

(END)